

摘藻堂四庫全書薈要

集部

欽定四庫全書薈要

集部

御選宋詩卷二



詳校官原任主事_臣李斯咏

欽定四庫全書薈要卷一萬八千三百八

集部

御選宋詩卷一

帝製詩

太祖

初日詩

欲出未出光邈邈
千山萬山如火發
須臾走向天上來
趕却殘星趕却月

太宗



賜陳搏

曾向前朝號白雲後來消息杳無聞如今若肯隨徵召
總把三峯乞與君

真宗

太廟樂章二首

奠瓚用萬國朝天

鴻源濬發睿圖誕彰高明錫羨累洽延祥巍巍藝祖溥
率賓王煌煌文考區宇大康珍符昭顯寶歷綿長物性

茂遂民俗阜昌甫田多稼禾黍穰穰含生嘉育鳥獸踰
踰八紘統域九服要荒沐浴惠澤祇畏典常隔谷分壤
望斗辨方並襲冠帶來奉圭璋我我雙闕濟濟明堂諸
侯執帛天后當陽何以辨等衮衣繡裳何以褒德路車
乘黃聲明煥赫雅頌汪洋啓茲丕緒佑我無疆大統斯
集大樂斯揚俯隆宗祏仰繼穹蒼

亞獻終獻用平晉樂

五代衰替六合攜離封疆竊據兵甲競馳天顧黎獻塗

炭可悲帝啓靈命濬哲應期皇祖丕變金鉞俄麾率土
執贄擴俗來儀瞻彼大鹵竊此餘基獨迷文告莫畏天
威神宗繼統璿圖有輝尚安蠢爾罔懷格思六飛夙駕
萬旅奉辭僕來發詠不陣行師雲旗先路壺漿塞岐天
臨日照宸慮通微前歌後舞人心悅隨要領自得智力
何施風移僭冒政治淳熙書文混一盛德咸宜干戈倒
載振振言歸誕昭七德永定九圍

玉清昭應宮樂章十一首

降聖真安

巍巍真宇奕奕殊庭規模太紫炳煥丹青元命祇答大猷是經多儀有踐丕應無形肆設金石聲聞杳冥佇迴飈馭永佑基扃

奉香靈安

芳氣上泱飈馭下臨紹承丕緒永勵精明氤氲成霧蔥鬱垂陰虔恭對越介祉攸欽

奉饌吉安

發祥有自介福無疆紛綸丕應保佑下方嘉薦斯備雅
奏具揚寅威洞達監肝昭章

玉皇位酌獻慶安

無體之體強名之名監觀萬寓統治九清真期保佑瑞
命昭明乾乾翼翼祇答財成

聖祖位酌獻慶安

於昭靈貺誕啓鴻源功濟庶彙慶流後昆蘭肴登俎桂
酒盈尊俯迴飈駕永庇雲孫

太祖位酌獻慶安

赫赫藝祖受命高穹威加海外化浹區中發祥宗祐錫
祐渺冲欽承積德勵翼精衷

太宗位酌獻慶安

明明文考儲精上蒼禮樂明備溥率賓王功德累洽歷
數會昌孝思罔極丕祐無疆

亞終獻冲安

太初非有體至道本無聲降跡臨下土成功陟上清至

仁敦動植丕緒啓宗祊紫禁承來格鴻基保永寧發祥
垂誕告至孝薦崇名廣樂伸欽奉儲休固太平

飲福慶安

明明始祖誕啓慶基翼翼後嗣虔奉孝思精潔斯達祉
福咸宜予以報貺予以受釐

徹饌吉安

雕俎在御飈駕聞聲真遊斯降旨酒斯盈大樂云闋大
禮云成徹彼常薦罄此明誠

送聖真安

精心既達真游允臻禮容斯舉福應惟醇將整仙馭言
還上旻永存嘉貺用泰丞民

賜楊億

瑣闥往年司制誥共嘉藻思類相如蓬山今日詮墳史
還仰多聞過仲舒報政列城歸覲後疏榮高閣拜恩初
諸生濟濟彌瞻望鉛槧諮詢辨魯魚

賜蔡伯佈

七閩山水多才俊三歲竒童出盛時家世應傳清白訓
嬰兒自得老成姿初當移步來朝謁方及能言便誦詩
更勵孜孜圖進益青雲千里看前期

題香藥庫

每歲沉檀來遠裔累朝珠玉實皇居今辰內府初開處
充物尤宜史筆書

仁宗

上辛祈穀樂章二首

太宗配位奠幣用仁安

天祚有開文德來遠祈穀日辛侑神禮展

酌獻用紹安

於穆神宗惟皇永命薦醴六尊聲歌千詠

夏至祀皇地祇樂章二首

太祖奠幣用恭安

赫矣淳耀倣載帝基一戎以定萬國來儀寅恭潔祀博
厚皇祇威靈有在福祿如茨

酌獻用英安

丕命惟皇萬物咸覩卜年邁周崇功冠禹有赫炎精大
昌聖祚酌鬯祈年永錫繁祐

孟夏雩祀樂章二首

太祖配坐奠幣獻安

昊天蓋高祀事為大嚴配皇靈億福來介

酌獻感安

龍見而雩神之來格犧象精良威靈赫奕

賜梅摯

地有湖山美東南第一州
剖符宣政化持橐輟才流
暫出論思列遙分宵旰憂
循良勤撫俗來暮聽歡謳

賞花釣魚

晴旭輝輝苑籞開
氤氳花氣好風來
遊絲罥絮縈行仗
墮蕊飄香入酒杯
魚躍文波時撥刺
鶯留深樹久徘徊
青春朝野方無事
故許遊觀近侍陪

神宗

分揭封樁庫上二十字

每度夕惕心妄意遵遺業顧予不武資何以成戎捷

徽宗

己亥十一月十三日南郊祭天齋宮即事賜太

師蔡京

報本精禋自國南先期清廟肅齋嚴層霄初擴同雲霽
暖吹俄回海日暹十萬軍容永作陣九街鴛瓦玉為簷
肅雍顯相同元老行慶均釐四海霑

題畫八首

海棠通花鳳

錦棠天與麗映日特妖嬈
五色絢儀鳳真堪上翠翹

杏花鸚鵡

並亞隴雲飛穗巢文杏枝
高棲良自得蜂蝶莫相疑

芙蓉錦雞

秋勁拒霜盛我冠錦羽雞
已知全五德安逸勝鳧鷖

千葉碧桃蘋茹

太平蜀雀異仍映碧桃間一秀三千歲高枝永共攀
聚八仙倒挂兒

垂身如逮下名冠八仙中最是天真處櫻脣一點紅
桃竹黃鶯

出谷傳聲美遷喬立志高故教桃竹影不使近蓬蒿
金林檎遊春鶯

佳名何拔萃美譽占遊春三月來禽媚嬉娛異衆倫
香梅山白頭

山禽矜逸態，梅粉弄輕柔。
已有丹青約，千秋猜白頭。

題趙昌江梅山茶

趙昌下筆摘韶光，一軸黃金滿斛量。
借我圭田二百畝，直須買取作花王。

禁苑荔支結實賜燕帥王安中

葆和殿下荔支丹，文武衣冠被百蠻。
思與近臣同此味，紅塵飛鞚過燕山。

幸徐常廬

人生何事厭囂塵
泛宅浮家冬復春
今日暫來猿鶴語
他年應召白雲人

宣和宮詞三百首

錄五
十首

春朝小雨乍新晴
祥靄勻收洞宇明
嚴警不聞人一語
海棠枝上曉鶯聲

塗丹輝映霽霞明
四啓微聞曉漏清
初御廣庭人意肅
九宮遙聽警鞭聲

御溝春水綠濺濺
曲沼迴波四接連
環碧下臨方鑑淨

遊魚跳躍浪痕圓

春工先與上林芳
迎歲紅梅破臘香
才過閤門分曲檻
弄晴繁蕊麗如粧

玉宇珍庭夜未央
月移花影上迴廊
精神勤禱祈民福
耿耿晴空靄露香

義獻真蹤勝古初
搜求方得到皇居
退朝彝鼎然沉水
因染霜毫更學書

太皇生日最尊榮
獻壽宮中未五更
天子捧觴仍再拜

寶墀侍立到天明

元宵三五競芳年十二都門沸管絃
鰲負繒山輝絳閣龍銜寶炬撒金蓮

翠芳庭宇疊山圍路轉龍盤燦陸離響石因風飄冷韻
小碑刊勒祖宗詩

承平皇族益繁昌鴈序天倫令德彰
此意絲長敦友愛時時別殿宴親王

宗政西清闕講筵簪裾雜沓盡英賢
守成當謹持盈戒

絢繹鳧鷖大雅篇

齊警開場設鼓鉦雷霆凜凜奏嚴聲通宵環衛無譁語
唯聽雞人巧唱更

珊瑚植立壯林巒翡翠巒岼作小灘几案自成清曠景
蓬山常對坐隅看

早臨書殿啓芸香冰硯難開肅曉霜初製煖爐新樣巧
雲龍突鏤遍金箱

秋來簾幕捲輕風一夜濃陰蔽遠空燕館乍涼人不寐

更聽疎雨滴梧桐

日冷天晴近臘時
玉階金瓦雪離離
浴堂門外抄名入
公主家人謝面脂

禁宇春回晝漏長
睿思宸極景相望
廻環路浥蒼苔合
一架茶蘼滿殿香

翠石宮堯競巧形
無雙惟是碧雲屏
坤輿秀色全融結
尤比三峯色更青

教化風行自掖房
芸輝新繕萬書堂
清閒几硯皆編帙

時誦闕睢正始章

花洞連延一架平
文鴛雙砌接珍亭
明輝北望垂楊岸
滿目煙波上下青

金題玉躑燦星光
御札紛紛雜紫黃
宣索女官三十六
就中誰是校書郎

三年禋祀敞園壇
星斗凝輝玉露寒
郊外燔柴煙欲斷
禁街人已待迴鑾

方響新成白玉牌
叩聲仍與八音諧
高低二八還相映

絲竹陶匏莫可偕

瑞日融和麗玉庭
花枝密處有鶯聲
六宮閒燕無餘樂
索寫新詩頌太平

湘簟涼生暑氣微
午天欹枕向紗幃
輓轡車扇間闌處
雙月迴廊彩鳳飛

緩步宮花夜漏清
廓然天宇月華明
凝眸望極無纖翳
惟有銀河一練橫

春池蘋藻綠盤跚
羣鴨相呼戲碧湍
兩兩輕舸閒倚岸

斜陽清景鑑中觀

太清樓畔柳依依
闌外飄飄綠線齊
魚鑰未開鈴鐸靜
一林鶖鳩占春啼

院宇花深鎖洞房
更闌銀燭尚熒煌
芸窗盡日觀前史
入夜乘閒覽諫章

巧簇羅牌翰苑詞
宜春相向貼門楣
近來清禁尤珍重
珠蹙金書御製詩

靈宮複道問東西
殿宇凝霜繡拱齊
時祀每懷霜露感

祖宗功德勉攀躋

苑西廊畔碧溝長
脩竹森森綠影涼
戲擲水毬爭遠近
流星一點耀波光

午夜登樓戶不高
長廊夾幕內人行
蟠龍尾道華燈合
五色雲中笑語聲

清曉輕雲鎖玉樓
樓前宮柳弄春柔
昇平宮宇浮佳氣
占得風光待宴遊

玉宇深嚴洞戶高
小山松柏四時青
遶闌下瞰溪流碧

恰似仙都一畫屏

龍鬚成布一端長珍重惟將寶匣藏
荒服獻珍誠足異承平八表自梯航

岷山遐表得靈犀剖出花紋兩脚齊
良匠涓辰成寶帶鴛鴦一對水中棲

五穀豐穰廣有秋漕司運絡奏年收
籍田得駕循常典潑麥園中結綺樓

小桃初破未全香清晝金胥漏已長
臨罷黃庭無一事

日移花影上迴廊

一夜濃雲布九霄忽成春色潤寒苗玉墀墀下鴛鴻列
欲曉傳宣教放朝

脩竹成林碧玉攢幾枝榮茂可棲鸞瑤宮月白風清夜
誰共庭除一凭欄

清晨檐際肅霜鮮曉日初消萬瓦煙隆德重陽開小宴
競將黃菊作花鈿

刺花彈篋紫檀弓何處星丸入苑中驚起流鶯花裏去

紛紛如雨落殘紅

琳庭節物樂無涯
又是餘寒易歲華
昨夜雪晴天氣好
後園初進蠟梅花

璇題玉額起層樓
三閣圖書集校讐
近日得增新碧榜
顯謨相繼繕徽猷

小雨飛輕助燕泥
萬花零落柳垂隄
紫清宮裏人稀到
廊外雙雙孔雀棲

蓬萊宮殿五雲低
廣內樓臺草色齊
憂在進賢忘寤寐

卷一
曉粧常是未鳴雞

機杼年來入禁垣
素絲初織未成端
遍呼御府令均玩
方識農家力最難

曉色輕陰四幕低
如膏小雨密霏霏
傳宣儀仗通廊立
唯恐沾濡近御衣

麻紙初新詔墨乾
金蓮未剪燭花殘
珠簾不隔霜華月
應比人間分外寒

高宗

圜丘樂章八首

昊天上帝奠玉幣嘉安

上穹昊天日星垂曜照臨下土王國是保維玉與帛寅
恭昭報永左右之欽若至道

皇地祇位奠玉幣嘉安

至哉坤厚隤然止靜柔載動植資始成性玉光幣色璨
若其映式恭禋祀有邦之慶

太祖皇帝位奠幣廣安

明明藝祖並侑泰壇肇造綿宇王業孔艱表正封略上
際下蟠躬以大報亦止于燔

太宗皇帝位奠玉幣化安

赫赫巍巍及時純熙昊天成命后則受之登邁邃古光
被聲詩有幣陟配孫謀所貽

昊天上帝位酌獻禧安

謁欵壇陞祇祀泰禋丘園自然可格至神桂尊登酌嘉
薦方新靡福菲眇敷祐下民

皇地祇位的酌獻光安

厚德光大承元之明茲潛享吹升于昭清永天桂海咸
資化成恭酌彝醪報本維精

太祖皇帝位的酌獻彰安

於赫皇祖創業立極肅肅靈命蕩蕩休德嘉觴精潔雅
奏金石丕顯神謨惟后之則

太宗皇帝位的酌獻韶安

丕鑠帝宗復受天命羣陰猶黷一戎大定奠鬯斯馨功

金
卷一
歌在詠佑啓後人文軌蚤正

郊前朝獻景靈宮樂章一首

聖祖位酌獻祖安

瑤源誕啓玉牒肇榮覆育羣有監觀圓清酒醴既洽登
薦惟誠無有後艱駿惠雲仍

題中和堂

六龍轉淮海萬騎臨吳津王者本無外駕言蘇遠人瞻
彼草木秀感此瘡痍新登堂望稽山懷哉夏禹勤神功

既盛大後世蒙其仁願同越勾踐焦思先吾身艱難務
遵養聖賢有屈伸高風動君子屬意種蠶臣

漁父辭三首

薄晚煙林淡翠微江邊秋月已盈輝縱遠柁適天機水
底閒雲片段飛

青草開時已過船錦鱗躍處浪痕圓竹葉酒柳花檀有
意沙鷗伴我眠

水涵微雨湛虛明小笠輕蓑未要晴明鑑裏縠紋生白

鷺飛來空外聲

晚春

草深煙景重林茂夕陽微
不雨花猶落無風絮自飛

梅花巖

怪石蒼巖映翠霞
梅梢疎瘦正橫斜
得因祀事來尋勝
試探東風第一花

題天台寺僧房二首

古寺春山青更妍
長松脩竹翠含煙
汲泉擬欲增茶興

暫就僧房借榻眠

久坐方知春晝長
靜中心地自清涼
人人圓覺何曾覺
但見塵勞盡日狂

有獻紅木犀花者愛之畫為扇面仍製詩以賜
從臣

月宮移就日宮栽
引得輕紅入面來
好向煙霄承雨露
丹心一點為君開

秋入幽巖桂影團
香深粟粟照林丹
應隨王母瑤池宴

染得朝霞下廣寒

孝宗

和史浩古詩三十韻

揖遜荷帝堯寅恭五元禩治道貴清淨聖言有深旨誰
歌元首明自得股肱喜躋民期仁壽詎肯中道止力農
樂彼田坐賈安于市歲行閱豐登國論銷委靡予力初
何能濟濟賴多士矧予有元老中立而不倚居東逾三
年不遠來千里未遂赤松遊輟誦青琅蕊皓首持六經

日侍明光裏翼乎鴻遇風縱矣魚在水儒行絕瑕疵道
心無塵滓挺挺松柏姿巉巉山岳峙予惟日萬幾至仁
同一視西成錫小宴促坐才尺咫湛露愧歌周置酒非
封齒歸美見新詩如卿能有幾眷言澄碧行勝賞得迂
趾亦屢引公卿對此談正理虚心欲受人忠言資逆耳
朕瘠天下肥至樂無易此頗念文武疆六合尚殊軌東
都會諸侯宣王昔于是期爾罄嘉謀使吾勲業起勿以
方燕貽所書聊復爾卮酒正須酌話言未能已都護萬

年觴何當至庭祀文章藉老手直筆中興紀載嘉矍鑠
翁焉得辭散散

春晴

春風歸草木曉日麗山河物滯欣逢泰時豐自此多神
州應未遠當繼沛中歌

題宮內飛來峯冷泉堂

山中色秀何佳哉一峯獨立名飛來參差翠麓儼如畫
石骨秀潤神所開忽聞仿像來宮囿指顧已驚成列岫

規模絕似靈隱前面勢恍疑天竺後孰云人力非自然
千巖萬壑藏雲煙上有崢嶸倚空之翠壁下有潺湲漱
玉之飛泉一堂虛敞臨清沼密蔭交加森羽葆山頭草
木四時春閱盡歲寒長不老聖心仁知情優閒壺中天
地非人間蓬萊方丈渺空闊豈若坐對三神山日長雅
趣超塵俗散步逍遙快心目山光水色無盡時長將挹
向杯中淥

玉津園賜和洪邁

春郊柔綠遍桑麻小駐芳園覽物華應信吾心非暇逸
頓回晴意絕咨嗟每思富庶將同樂敢務漁畋漫自誇
不似華清當日事五家車騎爛如花

秋日臨幸秘書省因成近體詩一首賜丞相史
浩以下

玉軸牙籤煥寶章簪紳列侍映秋光宴開芸閣儒風盛
坐對蓬山逸興長稽古右文慙菲德禮賢下士法前王
欲臻至治觀熙洽更罄嘉謀為贊襄

少帝

前溪曲

憂思出門戶逢郎前溪度莫作流水心引新都捨故

賜汪元量南歸

寄語林和靖梅花幾遍開黃金臺上客應是不歸來

鸚鵡

毛羽自然可數仙禽不受樊籠銜得梧桐一葉中含無

限秋風

御選宋詩卷一

欽定四庫全書薈要卷一萬八千三百九集部

御選宋詩卷二

四言詩一

王禹偁

籍田賦頌

倬彼東郊公田是闢大君戾止言耕其籍帝籍既脩乃
及公侯親爾耒耜勤爾田疇言采黍稷祀于圜丘億萬
斯年以承天休倬彼東郊耕壇其崇大君戾止言訓其

農農功既篤乃知榮辱爾家以給爾人以足言奉丞嘗
遍于比屋億萬斯年以介景福

宋祁

籍田頌

倬彼鮮原帝籍于田匪籍其勤我為民先悠悠春旗觀
土于畿陽膏澤澤邁乎三推有壬有林亦莫不祇我疆
我理或耘或耔實苞實茂第厥豐草田畷至喜祈年伊
早我穀用成我倉既盈我倉耽耽種于東南其用伊何

事神薦馨為酒為醴為粢為盛烝之浮浮釋之叟叟上
帝居歆降福孔休降福伊何我民既蕃室家溱溱三事
不諼食足武奮震疊爾功蠻夷來同罔不率從帝猷昭
升式于九圍兢兢業業以迄萬幾在豐念匱在飮思饑
子子孫孫勿替引之

夏竦

廣農頌

皇哉惟聖躬提天柄億兆歸心三農洽慶廣我田事肇

修稼政乃置官民乃頒號令號令惟何分條建規恩斯
懋斯流冗攸歸官名惟何啓職庀司訓之導之播種維
時民曰勤止服田力穡晝爾于耕宵爾無斃千耦偕飛
百穀咸植既藝浮鹵越經封洫官曰莅止糾力勸能痔
我錢鑄疏我溝塍乃能灌溉爰相丘陵汙萊以闢游惰
用懲赫赫聖謀有作咸覩畎澮四溟井疆九土沃野萬
里縱橫其畝擁耒成林灑流降雨陽春如膏原隰如鱗
我稼既華六合生雲稻粱黍稷萬井龍文同我婦子或

耨或耘八月其獲乃登爾稼滯穗棲原餘糧厭野盈溢
京庾流行方夏式歌且謠土金同價百姓足矣君孰不
足三百之同九年之畜八蜡既通五禮咸穆藏財于民
所寶惟穀君哉君哉樂事訓農炎帝之教后稷之功方
我王度明而未融臣之頌之永矣無窮

富弼

定州閱古堂詩

朔方之兵勁于九土尤勁而要粵惟定武兵勁在馭用

則罷虎失馭而勁驕不可舉曰保曰貝閉壁連阻武爵
斯守束手就虜皇帝曰噫汝武曷取有敝必革以儒于
撫公來帥定始以威怒有兵悍橫一用于斧連營怛之
膽栗腰偃既懼而教如鋪如乳以刺以射以鉦以鼓無
一不若師師旅旅列城自刺靡不和附陰沴為梗降此
大雨大河破洩在河之滸民被黜墊田入污莽流離蕩
析不得其所公感曰吁予敢寧處廼大招徠乃大保聚
乃營帛粟寒衣飢茹民歸而安水下孰禦強弱死生由

公復慮曰義曰仁震肅春煦合和蒸天天順以序公境
獨稔爰麥爰黍公俗獨樂夫耕婦杼人雖曰康公亦奚
豫謂此一方民與兵具務劇任重稽古其裕人皆謂公
與古為伍公文化民公武禦侮何思古人公不自許遂
擇竒匠繪于堂宇列其行事指掌可數前有古人在我
門戶後有來者依我牆堵斯堂勿壞有堂有故堂之不
存來者曷覩宏乎煥乎千載是矩

劉敞

閔雨 并疏

臣伏見春首以來天久不雨歷官李用晦治大衍
 軌革太醫趙從古治黃帝六氣咸以謂風旱歲惡
 然陛下焦心勞意側躬修德審樂損膳議獄宥過
 以迎導善氣爰及言事得罪者唐介杜樞之徒復
 特見甄序小大之臣莫不欣然人情悅則天氣和
 矣乃三月己巳日入而雨至於庚午詩不云乎益
 之以霖霖既優既渥既霑既足生我百穀以此見

聖人之德與天相符言出而物應行發而神助雖
水旱之災有常數者猶不能違之况其眇者乎竊
觀詩書所載盛德之君至誠動天之速未有及陛
下者也臣不勝鼓舞之至謹撰閔雨詩一首十三
章章六句投進以聞

堪輿綱縕一晦一明或沉而毀或亢而暘自古以然世
習為常

民生冥冥靡究靡知其幸而吉不幸而災猖狂妄行惟

所遇之

天命降監在我元聖兼覆慶裕四方既定惟民之恤無所疵病

伊年暮春旱久不雨人曰時哉歷有常數禹湯之賢莫能弗遇

帝獨喟息是豈足言化育萬物若鎔以埏患在誠薄不能動天

退而齋心淵默以居鐘鼓不抃宴遊不娛左右肅然一

懷瞿瞿

疏獄省刑與物更始內恕孔悲引咎在己爰及四海愚
智咸喜

追悟讜直褒進淹滯聲色無违式序在位嬖習權近攝
威屏氣

己巳乃雨若有鬼神淒淒其風滄滄其雲自東徂西罄
無不均

匪震匪拔匪溢匪洩生我百穀區萌畢達以亭以食小

大胥悅

天子之德視雨之施肇自京師達于四裔無有蠻貊乎
我君惠

天子之政視雨之時養老長幼速哉熙熙更化易俗而
民不知

天子之慶視雨之積自天降康時萬時億眉壽無疆以
靖四國

蘇洵

張益州畫像詩

天子在祚歲在甲午西人傳言有寇在垣庭有武臣謀
夫如雲天子曰嘻命我張公公來自東旗纛舒舒西人
聚觀于巷于塗謂公暨暨公來于于公謂西人安爾室
家無敢或訛訛言不祥往即爾常春爾條桑秋爾滌場
西人稽首公我父兄公在西園草木駢駢公宴其僚伐
鼓淵淵西人來觀祝公萬年有女娟娟閨闈閑閑有童
哇哇亦既能言昔公未來期汝棄捐禾麻芄芄倉庾崇

金
卷二
宗嗟我婦子樂此歲豐公在朝廷天子股肱天子曰歸
公敢不承作堂嚴嚴有廡有庭公像在中朝服冠纓西
人相告無敢逸荒公歸京師公像在堂

邵雍

不同吟

求者不得辭者不能二者相去其遠幾程

偶書

才高命寡恥居人下若不固窮非知道者

觀物吟

居暗觀明居靜觀動居簡觀繁居輕觀重所居者寡所
觀則衆匪居匪觀衆寡何用

師資吟

未知道義尋人為師既知道義人來為資尋師未易為
資實難指南嚮道非去非還師人則恥人師則喜喜恥
皆非我獨無是好為人師與恥何異

安樂吟

安樂先生不顯姓氏垂三十年居洛之溪風月情懷江湖性氣色斯其舉翔而後至無賤無貧無富無貴無將無迎無拘無忌窘未嘗憂飲不至醉收天下春歸之肝肺盆池資吟瓮牖薦睡小車賞心大筆快志或戴接羅或者半臂或坐林間或行水際樂見善人樂聞善事樂道善言樂行善意聞人之惡若負芒刺聞人之善如佩蘭蕙不佞禪伯不諛方士不出戶庭直際天地三軍莫凌萬鍾莫致為快活人六十五歲

甕牖吟

有客無知唯知自守自守無他唯求寡咎有屋數間有
田數畝用盆為池以甕為牖牆高于肩室大于斗布被
煖餘藜羹飽後氣吐胸中充塞宇宙筆落人間輝映瓊
玖人能知止以退為茂我自不出何退之有心無妄思
足無妄走人無妄交物無妄受炎炎論之甘處其陋綽
綽言之無出其右羲軒之書未嘗去手堯舜之談未嘗
虛口當中和天同樂易友吟自在詩飲歡喜酒百年升

平不為不偶七十康強不為不壽

盆池吟

有客無知唯知不為不為無他唯求不欺我有人是人
無我非因開甕牖遂鑿盆池都邑地貴江湖景竒能遊
澤國不下堂基簾外青草軒前黃陂壺中月落鑑裏雲
飛既有荷芰豈無鳧茨既有蚪蚪豈無蛟螭亦或清淺
亦或渺瀰亦或淥淨亦或漣漪風起蘋藻涼生袖衣林
宗何在范蠡何歸密雪霏霏輕冰披披垂柳依依細雨

微微可以觀止可以忘機可以照物可以看時不樂乎
我更樂乎誰吾于是日再見伏羲

大筆吟

有客無知為性太質不忤不求無固無必足躡天根手
探月窟所得之懷盡賦于筆意遠情融氣和神逸酒放
微醺綃鋪半匹如風之卒如雲之勃如電之歛如雨之
密或往或還或沒或出滌盪氛埃廓開天日鸞鳳翔翔
龍蛇盤屈春葩暄妍秋山崒岫三千簪裾俯循儒術百

萬貔貅仰聽軍律松桂成林芝蘭滿室蜀錦初番朝霞
乍拂白壁一雙黃金百鎰義之來求牧之來乞物外神
交人間事畢觀者析醒收之愈疾

善人吟

良如金玉重如丘山儀如鸞鳳氣如芝蘭

司馬光

瞻彼南山詩

瞻彼南山有栲有棠維葉牂牂君子之燕籩豆洋洋鼎

俎將將百羞阜昌上下樂康邦家之光君子萬年撫有
四荒受祿無疆瞻彼南山有楛有柎維葉湑湑君子之
燕清酒有奠壺樽有楚酌言觴之命之酌之上下以序
君子萬年永綏兆民受天之祐瞻彼南山有杞有樅維
葉逢逢君子之燕管絲雍雍奏鼓鼗鼗自堂徂庭上下
肅雍靡有不恭君子萬年命德高明高明有融赫赫明
明天命有嚴命我祖考九土是監倭馭之東蠻蠻之南
享獻允時靡敢不詹閱茲餘文復閣巖巖萬世是承四

方是瞻帝曰卿士左右之臣四方無虞矜爾之勤式觀
且遊從予一人于壺于闕于堂于陳金石之符翰墨之
珍匪予汝夸祖考之勲多士庶尹羣公百辟拜手稽首
答揚休德既醉既飽慎思爾職罔顧爾私罔愛爾力惇
忠祇勅永奉丕則立民之極載祀千億

王安石

新田詩

并序

唐治四縣田之入於草莽者十九民如寄客雖簡

其賦緩其徭而不可以必留尚書比部郎中趙君
尚寬之來問敝於民而知其故乃委推官張君恂
以兵士興大渠之廢者一大陂之廢者四諸小渠
陂教民自為者數十一年流民作而相告以歸二
年而淮之南湖之北操囊耜以率其妻子者其來
如雨三年而唐之土不可賤取昔之菽粟者多化
而為稊環唐皆水矣唐獨得歲焉船漕車輓負擔
出于四境一日之間不可為數唐之私廩固有餘

循吏之無稱于世久矣予聞趙君如此故為作詩

詩曰

離離新田其下流水孰知其初灌莽千里其南背江其
北逾淮父抱子扶十百其來其來僕僕鎔我新屋趙侯
幼之作者不饑歲仍大熟飽及雞鶩僦船與車四鄙出
穀今游者處昔止者流維昔牧我不如今侯侯來適野
不有觀者稅于水濱問我鰥寡侯其歸矣三歲于茲誰
能止侯我往求之

雲之祁祁答董傳

雲之祁祁或雨于淵苗之翹翹或槁于田雲之祁祁或
雨于野有槁于田豈不自我蒼兮其濟其在西郊匪我
為之我歌且謠蔚兮其復南山之側我歌且謠維以育
德

蘇軾

新渠詩

并序

庚子正月予過唐州太守趙侯始復三陂疏召渠

招懷遠人散耕于唐予方為旅人不得親執壺漿
簞食以與侯勸逆四方之來者獨為新渠詩五章
以告于道路致侯之意其詞曰

新渠之水其來舒舒溢流于野至于通衢渠成如神民
始不知問誰為之邦君趙侯

新渠之田在渠左右渠來奕奕如赴如湊如雲如積如
屋如溜嗟唐之人始識秔稌

新渠之民自淮及潭挈其婦姑或走而顛王命趙侯宥

我新民無與王事以訖七年

侯謂新民爾既來止其歸爾邑告爾鄰里良田千萬爾
擇爾取爾耕爾食遂為爾有

築室于唐孔碩且堅生為唐民飽粥與饘死葬于唐祭
有雞豚天子有命我惟爾安

觀碁

并序

余素不愛碁獨遊廬山白鶴觀觀中人皆闔戶晝
寢獨聞碁聲於古松流水之間意欣然喜之自爾

欲學然終不解也兒子過乃粗能者儋守張中日
從之戲予亦隅坐竟日不以為厭也

五老峯前白鶴遺址長松蔭亭風日清美我時獨遊不
逢一士誰歟碁者戶外屨二不聞人聲時聞落子紋枰
坐對誰究此味空鉤意釣豈在魴鯉小兒近道剝啄信
指勝固欣然敗亦可喜優哉游哉聊復爾耳

洞酌亭

并引

瓊山郡東衆泉鬱發然皆冽而不食丁丑歲六月

予南遷過瓊得雙泉之甘於城之東北隅以告其人自是汲者常滿泉相去咫尺而異味庚辰歲六月十七日遷于合浦復過之太守承議陸公求泉上之亭名與詩名之曰洄酌其詩曰

洄酌兩泉挹彼注茲一鉞之中有澗有溜以淪以烹衆
喊莫齊自江徂海浩然無私豈弟君子江海是儀既味
我泉亦濟我詩

何公橋詩

天壤之間水居其多人之往來如鶻在河順水而行雲
駛鳥疾維水之利千里咫尺亂流而涉過膝則止維水
之害咫尺千里沔彼濫觴蛙跳鯨游溢而懷山神禹所
憂豈無一木支此大壞舞于盤渦冰折雷解坐使此邦
畫為兩州雞犬相聞胡越莫救允毅何公甚勇于仁始
作石梁其艱其勤將作復止更此百難公心如鐵非石
則堅公以身先民以悅使老壯負石如負其子疏為玉
虹隱為金堤直欄橫檻百賈所棲我來與公同載而出

謹呼填道抱其馬足我歎而言視此滔滔未見剛者孰
為此橋願公千歲與橋壽考持節復來以慰父老如朱
仲卿食于桐鄉我作銘詩子孫不忘

江郊詩

并序

惠州歸善縣治之北數步抵江少西有磐石小潭
可以垂釣作江郊詩云

江郊蔥曠雲水清絢碕岸斗入洄潭輪轉先生恍之布
席間燕初日下照潛鱗俯見意釣忘魚樂此竿綫優哉

悠哉玩物之變

答龐參軍

并序

和陶

周循州彥質在郡二年書問無虛日罷歸過惠為
余留半月既別和此詩追送之

我見異人且得異書挾書從人何適不娛羅浮之趾卜
我新居子非玄德三顧我廬

旨酒荔枝絕甘分珍雖云晚接數面自親海隅一笑豈
云無人無酒酤我或乞其鄰

將行復止眷言孜孜苟有于中傾倒出之奕奕千言粲
焉陳詩觴行筆落了不容思

卅妙侍側兩髦了分歌舞壽我永為歡欣曲終悽然仰
視浮雲此曲此聲何時復聞

擊鼓其鏜船開艣鳴顧我而言雨泣載零子卿白首當
還西京遼東萬里亦歸管寧

感子至意託辭西風吾生一塵寓形空中願言謙亨君
子有終功名在子何異我躬

時運

并序

和陶

丁丑二月十四日白鶴峯新居成自嘉祐寺遷入
詠淵明時運詩云斯晨斯夕言息其廬似為余發
也廼次其韻長子邁與余別三年矣挈攜諸孫萬
里遠至老朽憂患之餘不能無欣然

我卜我居居非一朝龜不我欺食此江郊廢井已塞喬
木干霄昔人伊何誰其裔苗

下有澄潭可飲可濯江山千里供我遐矚木固無脛瓦

豈有足陶匠自至歡歌相樂

我視此邦如沫如沂邦人勸我老矣安歸自我幽獨倚
門或揮豈無親友雲散莫追

旦朝丁丁誰欵我廬子孫遠至笑語紛如剪髮垂髻覆
此瓠壺三年一夢迺復見余

停雲

并序

和陶

自立冬以來風雨無虛日海道斷絕不得子由書
迺和淵明停雲詩以寄

卷二
停雲在東黯其將雨嗟我懷人道脩且阻眷此區區俛
仰再撫良辰過鳥逝不我佇

颺作海渾天水溟濛雲屯九河雪立三江我不出門寤
寐北窗念彼海康神馳往從

凜然清癯落其驕榮餽奠化之廓兮忘情萬里遲子晨
興宵征遠虎在側以寧先生

對奕未終摧然斧柯再遊蘭亭默數永和夢幻去來誰
少誰多彈指太息浮雲幾何

和勸農六首

并序
錄四首

海南多荒田俗以貿香為業所產秔稌不足於食
乃以諸芋雜米作粥糜以取飽余既哀之乃和淵
明勸農詩以告其有知者

咨爾漢黎均是一民鄙夷不訓夫豈其真怨忿劫質尋
戈相因欺謾莫訴曲自我人

天禍爾土不麥不稷民無用物怪珍是殖播厥薰木腐
餘是穡貪夫污吏鷹鷂狼食

宜無良田膾膾平陸獸蹤交締鳥喙諧穆驚磨朝射猛
豨夜逐芋羹諸糜以飽耆宿


聽我苦言其福永久利爾鉏耜好爾鄰偶斬艾蓬藿南
東其畝父兄搢槌以扶游手

御選宋詩卷二

謹案卷一第十五頁前四行三閣圖書集校讐刊
本校作較今改

卷二第十八頁前四行剪髮垂髻按東坡集作剪
髮垂髻與此異





總校官庶吉士臣侍朝

校對官檢討臣蕭九成

謄錄舉人臣李駟

欽定四庫全書薈要

集部
御選宋詩卷三
四

詳校官原任主事臣李斯咏



欽定四庫全書薈要卷一萬八千三百十

集部

御選宋詩卷三

四言詩二

蘇轍

和子瞻次韻陶淵明停雲詩

并引

丁丑十月海道風雨僭雷郵傳不通子瞻兄和陶
淵明停雲四章以致相思之意轍亦次韻以報

雲跨南溟南北一雨瞻望匪遙檻穽斯阻夢往從之引

手相撫笑言未半捨我不佇

晚稻欲登白露霄濛人飲嘉平漿酒如江我獨何為觀
成于窗此心了然來無所從

欣然而笑是無枯榮手足相依所種則情情忘意消神
凝不征可以安身可以長生

跋扈飛揚誰匪南柯運歷相尋憂喜雜和我游其外所
享則多削迹拔木其如予何

和子瞻次韻陶淵明勸農詩

并引

子瞻和淵明勸農詩六章哀僭耳之不耕予居海
康農亦甚惰其耕者多閩人也然其民甘於魚鱖
蟹鰕故蔬果不毓冬溫不雪衣被吉貝故藝麻而
不績生蠶而不織羅紈布帛仰于四方之負販工
習于鄙朴故用器不作醫奪於巫鬼故方術不治
予居之半年凡羈旅之所急求皆不獲故亦和此
篇以告其窮庶或有勸焉

我遷海康實編于民少而躬耕老復其真乘流得坎不

問所因願以所知施及斯人

我行四方稻麥黍稷果蔬蒲荷百種咸植糞溉耘耔乃
後有穡爾獨何為開口而食

掇拾于川搜捕于陸俯鞠婦子仰薦昭穆閩乘其媮載
耒逐逐計無百年謀止信宿

我歸無時視汝長久孰為沮溺風雨相耦築室東皋取
足南畝后稷為烈夫豈一手

斲木陶土器則不匱績麻繅繭衣則可冀藥餌具前病

安得至坐而告窮相視徒愧

莫為之先冥不謂鄙一夫前行百夫具履以為不信出
視同軌期爾十年風變而美

堂成

築室三年堂成可居我初不知諸子勞勩父母老矣風
雨未除橐裝幾何勿問有無伐木于山因此舊廬不約
不豐燕處無餘堂開六楹南北四筵晝明廓然夜冥黯
然四鄰無聲布被麤氈身非蚌螺一睡經年夜如何其

跌坐燕安善惡不思此心自圓東廂靖深以奉嘗烝老
佛之廬朝香夜燈西廂千卷圖書之林先人所遺子孫
是承杖屨經行直如引繩顧視而笑此如我心諸子之
室左右我背將食擊板一擊而會瓜畦芋區分布其外
鉏去瓦礫壤而不塊廢井重浚泉眼仍在轆轤雷鳴甘
雨時霈園夫能勤家足于菜有客叩門賀我堂成揖客
而笑念我平生三世讀書粗免躬耕明窗修竹惟我與
兄蔭映茅茨吐論崢嶸猖狂妄行以得此名老而求安

匪以為榮

雙柳

我作新堂中庭蕭然雙柳對峙春陽既應千條萬葉風
濯雨洗如美婦人正立櫛髮髮長至地微風徐來掩冉
相繆亂而復理垂之為纓縮之為結屈伸如意燕雀翔
舞蜩螗斯鳴不召而至清霜夜落衆葉如剪顏色憔悴
永愧松柏歲寒不改見歎夫子聊同淵明攀條嘯詠得
酒徑醉一塵粗給三黜不去亦如展惠

孔武仲

江豚詩

黑者江豚白者白螿狀異名殊同宅大水淵有羣魚掠
以肥己是謂小害顧有可喜大川夸平縞素不起兩兩
出沒矜其頰紫若俛若仰若躍若跪舟人相語驚瀾將
作巫入灣浦踣檣布符俄頃風至簸山搖岳浪如車輪
氛霧相薄舟人燕安如在城郭先事而告昭哉爾功鱈
啗牛馬頭鼉象龍暴殄天物安得爾同于人無害所欲

易充暴露形體告人以忠又多膏油以助女工江湖下
貧機杼以農烏鵲知風商羊識雨大厦之下風雨何苦
豈知舟航方在積險以爾占天著蔡之驗古之報祭不
遺微蟲孰揚爾烈登薦蜡宮世不爾好復惟爾惡我作
此歌為昭其故

陳襄

郊祀慶成詩

皇帝即位厲精求治翼翼兢兢以畏天異乃見宗廟乃

嚴郊祭赫赫烈祖陟配上帝皇帝肇祀心虔誠至齋居
徹膳夙興弗寐不履黃道不御小次出宿于廟陰雨翳
翳既其徂郊日出晰晰登丘奏假天地澄霽禮終樂闋
神貺來暨皇帝還蹕千乘萬騎雷動天旋臣民欣慰御
樓賜赦躬冊母地恩流澤洽周匝無際惟誠感神惟德
銷沴皇帝能嚮時賜坐致臣願皇帝事天寅畏左右惟
賢安民惟惠無拂忠諫無輕政事日新一日庶答天意

登彼公堂燕貢士

登彼公堂維水湯湯君子燕湑其言有章
登彼公堂有松有柏君子燕湑其儀孔特
登彼公堂維山崔嵬君子燕湑其志不回
登彼公堂鴻飛戾止君子燕湑維其不已

彭汝礪

送范侍郎歸許昌

鳳鳴嗒嗒其羽儀儀其集伊何梧桐之枝鴻飛冥冥其
翼差差其止伊何清泠之池朝廷于公夫豈不知國有

大疑爰度爰咨公雖家居如在廟堂國之大經論討靡

忘

公在仁宗時數論尺度是非去年朝廷修樂公亦預議今雖家居然討論猶不廢

徐徐公車

在汴之郊薄言追之以永今朝汎汎公舟在河之陰薄
言維之以慰我心公賜我言我斯藏之何以報之羔羊
素絲秉德不遺公飲我酒我斯酬之何以祝之秀髮厖
眉受福無期

傅察

送傅倅

洺之水兮其流舒舒公之來兮朱服熊車士元展驥仲
舉題輿公之來兮民斯樂胥洺之水兮其流洋洋公之
化兮春雨秋陽袴襦頌洽禾黍歲穰公之化兮民斯悅
康洺之水兮其流瀾瀾公之去兮旌旗旖旎父老攀轅
搢紳方軌公之去兮瞻望徒倚洺之水兮其流洩洩公
之德兮此邦所愒吏遵其畫人懷其惠公之德兮久而
弗替洺之水兮其流活活公之名兮茲其彌達翔于朝
著騫乎省闈公之名兮莫我敢遏

李綱

余來湖外家問不通者累月因和淵明停雲一
篇以遣懷

上天停雲以陰以雨我之懷矣川路脩阻田園將蕪幼
稚誰撫鴈信來遲鶴立以佇

淒淒其風零雨其濛自去梁谿爰止西江一室蕭然卧
于北窗塊獨處此人誰我從

豈無軒裳誰適為榮人之生世亦以有情亂離瘼矣棄

家遐征知我如此不如無生

今夕何夕鵲遶庭柯載植其尾迭相鳴和發書占之遠
問為多兆而未至我懷若何

曹勛

乾道聖德頌

并序

臣恭惟皇帝陛下膺上聖之期繼中興之統紹登
四載恭勤百為廼乾道改元政事具舉營戍罷屯
黎民於變時雍廷臣小大率職致淮北之蝗入境

自斃秋成之積歲登大有是皆陛下聖德昭著雖
黃童白叟所不待言而知臣以草莽之賤迫桑榆
之年際遇四朝叨塵二府豈不知清明之時方深
貪戀太懼榮祿浮實莫允清議故控露忱悃仰瀆
天聰特蒙賜俞已幸晚境安處間退日聽康衢熙
熙之謠顧老臣不當以翰墨輒塵宸扆然抃蹈之
餘有不能自己者謹擬元和之作極思選言撰成
乾道聖德頌昧死上進雖未能形容聖德之萬一

庶少伸臣子歸美之誠其辭曰

維聖有作紹隆興運天經地義宗堯越舜風俗醇厚日
星清潤冰天桂海咸祇成訓皇矣藝祖肇開宗祊用集
大命再造羣生卜世卜年周室與京德懋聖孫區宇再
寧龍潛出震握符御極恭儉慈仁已隆燕翼勵精治具
羣工惟辟斯皇聖德以受方國躬秉要道化成斯民間
寢侍膳克勤日新刑于四海率土興仁至矣聖孝悅安
嚴親猶夏餘種久失我重稍恢雄畧盡還尊奉復脩絳

樂亟續騫貢布昭聖武式皇鉅宋洪宣景命受振皇綱
詔令諭旨粉澤八荒宸奎逸彩龍鳳騫翔煥乎聖文彬
彬日彰誕敷武節克柔強鷲風靜邊柝煙沉晚燧穡夫
力田塞馬垂轡巍巍聖功允格康濟光啓元良鶴禁建
儲遴擇端方贊翊詩書濬哲文思日親睿謨於赫聖明
有開令圖當天執錄了無玩好貴異獻輸蕩然一掃力
敦嘉靖詢謀政要丕鑠聖斷坐臻是奧從容總攬用體
乾剛文武一道督以經常王化溥博景風丕祥格天聖

治時雍時康咫尺威顏豁達方寸日角珠庭金聲玉振
穆穆皇皇天儀明潤洪惟聖表萬寓朝覲乃武乃文止
戈好生華夏蠻貊底于丕平罔或反汗克斷惟明長策
遠馭奕奕天聲寶緒重光密答純佑既協皇極昭報方
茂堯父舜子撫封增舊行復九有亘萬萬壽大哉乾元
萬物資之赫赫明世吾君繼之熾昌隆祚惟皇造之億
萬斯年惟皇保之

鄭剛中

南陔詩 并序

南陔補亡也念劬勞之恩重痛逮事之無日故作
是詩以慕焉

陟彼南陔有風惟薰曷念劬勞華髮盈巾彼髮之華尚
可剪也嗟嗟吾親不可見也

陟彼南陔其薰遠兮慨我功名今亦晚兮功名之晚尚
可為也嗟嗟吾親不可追也

彼居之子庭闈休休愛日之念胡弗省修

瞻彼禽鳥亦哺其母養而弗驩于老奚取
敬爾身矣懌其親矣逮其暮矣云何吁矣

羅願

酬寺簿勸農追和淵明

江漢之會中具五民見異而遷乃喪厥真相彼樊山我
行所因有閑其壤問彼居人

方時清明家自為稷其藪其浸其動其植孰為使民有
田不穡亦惟蒲魚恃此鮮食

歲運周回景躔西陸帝籍重開天顏逾穆耕事將起毋
荒遊逐凡我農官戒民宜宿

戒民伊何美成在久譬彼射侯則求其耦驅率慵惰轉
緣南畝數云疾收在而心手

農亦有書匪藏金匱盍耕如莘盍饁如冀桑陰清好濁
醪日至已勤而食則無所愧

勿謂此州遠連邊鄙我疆西北盡其四履風雨順時日
星循軌屢豐作頌以致歸美

張栻

淳熙四年二月既望靜江守臣張某奉詔勸農
于郊乃作熙熙陽春之詩二十四章章四句以
示父老俾告於其鄉之人而歌之

熙熙陽春既發既舒翼翼南畝是展是圖
嗟爾農夫各敬乃事往利爾器誠爾婦子
惟生在勤勤則及時惟時之趨時不爾違
祈祈甘雨膏我下土習習谷風和澤乃普

往卽爾耕惟力之深往時爾苗勿倦其耘

于日于夕自遂自達爾心勿忘彼生孰遏

惟天之心矜我下民民不違天使爾有成

既穡既實既堅既好爾穫既周先養爾老

保爾家室撫爾幼穉既迄有年復思嗣歲

嗟爾父老其訓其誠俾務于本惟土物愛

不念其本則越其思所思既越害斯百罹

嗟爾父老其告其喻爾之有生君實覆汝

尊君親上其篤勿忘小心畏忌率于憲章
嗟爾父老教之孝悌孰無父母與其同氣
友于爾心孰無愛敬即是而推烏往不順
嗟爾父老勿替諄諄其未率從警厲其身
告以禍患其使知懼無俾蹉跌以陷罪罟
惟國之法煌煌其垂使爾知避宜欲爾施
爾或自陷予疚予恫曷使予懷寘于爾衷
於赫聖主敷德流澤布宣弗厪時予之責

咨爾父老助予念茲豈予之助報國自宜
粵以今日勸相于郊乃作此詩以懋爾勞
咨爾父老尚演厥義其諷其歌于鄉于里
俾一其心服我訓言擊鼓坎坎自古有年

陳造

次程帥勸農和陶詩韻

并序

房民種藝簡率水旱豐歉一委之天人力不至且
不知用水車土皆桑柘地而蠶事尤鹵莽因帥勸

農和陶詩次韻呈帥且示其民之不甚愚惰者

我官于房庸諗房民是腹枵然惟貯一真服事告工以
成以因雄也言之參天以人

燥之潤之是有黍稷天不竟刈物豈自植繫人之力温
飽稼穡惟蠶而衣如稼而食

盍植于家盍桑于陸飼眠後先如族昭穆爰繰爰織如
寇之逐悠悠玩日迄莫歸宿

孰溉不車曾不計久孰視槁乾徒用播耦吳豐楚約誰

非朕畝穗斯爾斯均措厥手

彼多其儲汝則易匱做勞計工寧終不冀蹀躞十駕與
驥一至朽中亦立吾代爾愧

吏職民憂無庸汝鄙農以濟學緊吾素履豈曰多言率
遵前軌教詔順從庶或兼美

程帥和陶二詩見憶次韻

我瞻西郊雲停不雨雞栖亂山十舍千阻一書緘春尉
厲存撫望之或違搔首企佇

停雲醜之蜚雨濛濛啓筒有獲如渴吸江孤月河漢輕
颺牖窗憶侍誨色杖屨後從

盱衡推予袞袞儷榮靡懷不傾靡言不情會晤良難歛
然西征孰謂愁斛無自而生

竹萌觸雪粟花綺柯風日山城未春已和命駕取塗計
日不多官曹簡書公其謂何

葉茵

別可山

松江之左可漁可農古樹陰陰碧波溶溶子契予好攜
家而從載笑載語乃棹輕篷冥訪前脩天隨室邇中心
孔嘉爰居爰止有薰自南景物清美槐柳于前煩歆潛
弭吾有旨酒與子酌之既醉且舞且歌而詩陶然樂只
厥情怡怡一日舍去豈不念茲客懷先秋興言欲別屢
止屢辭行計已決送子于舟期我乎雪敬哉前邁于時
炎熱惆悵若失延佇長津復面猶賒奈何夕晨豈無他
友白首如新念子實繁融融天真北山有梅南山有雲

下有猿鶴中有隱君千里命駕余敢不塵乃志必獲載
歌斯文

葉適

題人扇

外德欲晦面目自蔽內德欲耀肝胆畢照二法相除我
則有餘穆如清風用之不窮

林希逸

題江貫道山水

遠山叢叢遠樹濛濛咫尺萬里江行其中短長何岸高
低何峯彼坻彼峙彼瀑彼洪晴嵐乍豁煙靄蔥蘢或斷
或續且淡且濃爾萃奚寺爾盤奚宮或垣陰翳或梁嵌
空有吠者屨有樵者翁危檣落碇短棹掀蓬往來異趣
寂動殊容幕翠其庭豈非盧鴻略約而渡豈非龜蒙昔
我經行雲山萬重若淮南北與江西東亦衰而雨亦帽
而風乃今追惟夢境相從及此開卷恍然昔同誰居作
者造化論功淹總其裔熙成是宗聲聞九陛既召而終

謂彼樹白識其身窮其然豈然訊之天公此名宮壤疇
曰不逢

邵桂子

疏屋詩為曹雲西作

草菜可食總名曰疏品題有圃樹藝有書衡縱町畦周
繞屋廬繚以樊垣經以浜渠晨出抱甕夕歸荷耜有蔓
必藹有蝗必驅風披雨沐日烜露濡稗甲怒生嘉苗蔚
敷芥薑杞菊韭薤蒜葫薇蕨藜藿瓜瓠匏楮雞桑鶩

箝龍梭魚馬齒鹿角鼠尾虎鬚薯蕷蔓菁杜蘅薜蘿茵
陳莪蘿茺蘭茹蘆赤莧銀茄翠荇墨菰酸漿辣茹甘薺
苦茶庖人調脯園丁拮据錡釜鶯煤筐筥貯儲椒橙內
交醯醢効劬以芼以湘可茹可殖維昔尼父瓜祭齊如
飲水曲肱其樂只且召南蘋藻韓奕筍蒲知味羨黃咬
根歎胡葵蓼飫顛蔥韭厭徐火芋明瓚山菌接輿庾郎
三種石生一盂劉叅玉版蘇傳冰壺巢字元修鮒姓豆
盧菘羔抱孫蹲鴟將雛絲滑露葵練淨土酥野薺餛飩

水苔脯膾餅炊菠稜鮓釀芑蘆胡麻饋餽罌粟醍醐萍

虀西晉尊羹東吳芹擷泥坊藤采豐湖沼汴有繁江漢

有萋岡有常泉洲有接余鴈門天花黃河磨菇大菟苜

宿太華芙蓉環滁野菡盤谷山茹地饒所產天茁此徒

菲封是采口腹以娛落英未莎初篁未筴霜根旋挑露

葉半舒烹泉石鼎養火地壚色炫七箸香浮枌杓氣含

土膏味逾天厨肥生華池響鳴輔車商顏飢解文園渴

甦前招麴生後引酪奴饌非羶葷餉非芑苴園無羊踏

壤有鼠餘彼哉肉食俎列豢芻心炙椎牛項鬻割猪春
羔秋麝冬魚鱸夏胸猩脣豹胎麋鷄蟹胥緇裘解鼈銀絲
膾鱸羊尾截肪錦襖脫膚山殺雉兔澤羞鴈鳧北饌潼
酪南烹鼃蜍嗜鼠則鷓甘帶則蛆廼笑鄭老爛蒸瓠齏
乃笑坡翁夢餐雞蘇屬厭饕餮飽死侏儒語以疏味能
知否乎予雅嗜之日不可無乃顏茲屋羞供是須寧疏
而癯毋肉而腴易牙司味敢告膳夫

錢仲鼎

題趙鷗波高士圖

在昔洛陽雪深丈餘士也高卧來令尹車今年吳淞雪
復何如積素一色鷗鷺有無之子江臯修亭是居

有琴有書有酒有魚賞靜獨眺聊以自娛挹落清風凜
凜起予此景此圖再卷再舒

文天祥

贈劉矮跛相士

鍊石為形鏗金為音世方好圓瘖守方心陰陽網縕人

一氣質善惡之微證于聲色意所欲發雖吾不知彼美
子劉洞其先幾骯髒難合今世道病如子所言生稟已
定慙夫勇士往往一偏以視妾婦豈不猶賢洪範得三
二曰剛克會其歸其好是正直學問工夫氣質用微汝
能觀形安知其餘子術已定吾情已成子執子術吾安
吾情

贈楊樵隱應炎談命

莘郊一介堯舜君民薇山二難百世忠清富春釣叟涕

漢雲臺終南遯士仕宦梯媒是數公者俱以隱名木石
一跡霄淵異情九華山人賣樵江湖請算世間幾種樵
夫

題毛霆甫詩集

英英白雲在澗之濱彼美人兮其德孔純
英英白雲在澗之阿彼美人兮其思孔多
白雲英英澗水泱泱彼美人兮碩大且昌

御選宋詩卷三